

RESOLUCIÓN POLA QUE SE MODIFICA O PERÍODO DE EXTRACCIÓN DE SEMENTE DE MEXILLÓN

ANTECEDENTES

1. O 26.11.2025 reúnese con carácter extraordinario a Comisión do Mexillón para, entre outras cuestións, avaliar o estado da semente de mexillón en bancos naturais para a presente campaña, segundo a información recollida na análise das poboacións de semente de mexillón (*Mytilus galloprovincialis*) en hábitats intermareais rochosos, nas provincias da Coruña e Pontevedra, realizadas polo Centro Tecnolóxico do Mar e o Centro de Investigacións Mariñas de Galicia.
2. O 27.11.2025 o director xeral de Pesca, Acuicultura e Innovación Tecnolóxica emite informe no que, en síntese, indica que non observa ningún inconveniente en que se modifique o período para a extracción de semente de mexillón en rocha, retrasando o seu inicio, e establecendo como período de extracción o comprendido entre o 2 de xaneiro e o 30 de abril de 2026.

CONSIDERACIÓNS LEGAIS E TÉCNICAS

1. O Decreto 406/1996, do 7 de novembro, polo que se aproba o Regulamento de viveiros de cultivos mariños nas augas de Galicia, modificado polo Decreto 338/1999, do 3 de decembro, dispón que as condicións das habilitacións para o abastecemento de semente en banco natural, as zonas e períodos de extracción e as cantidades máximas a extraer en cada zona, se regularán mediante Orde da consellería competente en materia de acuicultura.
2. Por Orde do 26 de outubro do 2000 regúlase a extracción de semente de mexillón en bancos naturais, fixando no seu artigo 4 como período de extracción o comprendido entre o 1 de decembro e o 30 de abril. Á súa vez establécese que se prohíbe a extracción de semente os sábados, domingos e festivos.





3. A disposición adicional da Orde do 26 de outubro do 2000 establece que en función das características conxunturais de cada campaña e cando o seguimento e avaliación dos recursos o aconselle, a dirección territorial, dentro do ámbito da súa competencia, poderá modificar as zonas, cantidades e períodos de extracción mediante resolución motivada que deberá ser comunicada aos interesados.

4. O director xeral de Pesca, Acuicultura e Innovación Tecnolóxica emitiu informe o 27.11.2025 no que deixa constancia de que o director do Centro de Investigacións Mariñas presentou ante a Comisión do Mexillón reunida o 26.11.2025, a análise das poboacións de semente de mexillón en distintos puntos do litoral de Galicia, concluindo que se *"debe valorar a conveniencia de retrasar o período de extracción de mexilla, coa finalidade de conseguir que se asente o recente recrutamento e se harmonicen os diferentes recrutamentos que as forman, para deste xeito conseguir que os tamaños da mexilla sexan o máis homoxéneos posibles e, en consecuencia, a distribución de tamaños sexa máis homoxénea."*

Asemade, engade o director xeral de Pesca, Acuicultura e Innovación Tecnolóxica no dito informe do 27.11.2025 que os representantes da Comisión do Mexillón manifestaron de forma maioritaria que a medida dun aprazamento da apertura da extracción pode ter efectos positivos, dando a súa conformidade ao atraso da campaña ata o 2 de xaneiro de 2026.

Por conseguinte, de acordo co seguimento e avaliación realizada polo Centro de Investigacións Mariñas, cabe concluír que o estado do recurso aconsella modificar o período de extracción de semente de mexillón, atrasando o seu inicio ata o 2 de xaneiro de 2026.

5. Esta Dirección Territorial é competente para ditar esta resolución, de acordo coa disposición adicional da Orde do 26 de outubro do 2000.

En base ao exposto,

RESOLVO

Modificar, con carácter extraordinario, o período de extracción de semente de mexillón en bancos naturais do ámbito territorial de competencia desta





dirección territorial e no Arquipélago de Sálvora, cara leste da Illa de Sálvora (de Punta Lagos a Punta Besugueiros), establecendo como período de extracción o comprendido entre o 2 de xaneiro de 2026 e o 30 de abril de 2026, entre as 7:00 e as 20:00 horas; respectando a prohibición de extraer semente de mexillón os sábados, domingos e festivos.

Contra esta resolución, que non pon fin á vía administrativa, poderase interpoñer recurso de alzada no prazo dun mes ante a persoa titular da Consellería do Mar, de conformidade co disposto nos artigos 121 e 122 da Lei 39/2015, do 1 de outubro, do procedemento administrativo común das administracións públicas.

A Coruña,

A directora territorial

Documento asinado dixitalmente á marxe

